

Date – 18/04/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

- Mamit bawrhsap-in a hriattir hnu-ah North Tripura district thuneitute chuan Thaidawr panna kawng an rawn laih an titawp nghal.
- Vawiin khawvel chhandam tura Isua Krista khenbeh Ni (Good Friday) chu Mizoram pumah urhsun taka serh a ni.
- Food, civil supplies & consumer affairs department chuan mipui buhfai ei tur phur a kawng laka hralh rutute lakah FIR an thehlut.
- Chhatisgarh-ah Maoist hel 22, thuneitute kutah an inpe.

<><><>

BORDER ROW

Home minister Pu K. Sapdanga chuan Mamit bawrhsap-in a hriattir hnu-ah North Tripura district thuneitute chuan Phuldungsei ram Thaidawr a kawng an rawn laih chu an tihtawp nghal thu a sawi.

Pu K. Sapdanga'n Akashvani Aizawl a hrilh danin sorkarin ti tura a hrilh angin Mamit bawrhsap Pu K. Laltlawmlova chuan North Tripura bawrhsap Pi Chandni Chandran chu Nilaini tlai khan be nghalin Thaidawr a kawng an rawn siam chu chawlhsan turin a hrilh a, an hna pawh an chawlhsan nghal a ni. Home minister chuan he lai a ram inchuh chungchangah hian Mamit leh North Tripura bawrhsapte chu inbe tura ruahmanna siam a nih thu a sawi a. A tul dan a zirin state sorkar thuneitute inbiakna tur pawh ruahman theih a nih tur thu a sawi bawk.

Puan tawh angin Tripura sorkarin Thaidawr-ah kawng an siam tih hriat a nih ve leh Mizoram sorkar chuan Forest Minister Pu Lalthansanga chu a hmunah a tir nghal a. Minister hian Phuldungsei khawtlang hruaitute nena an inkawmna-ah he lai hi sorkarin a ngaihthah rei avangin Tripura lam hian kawng an rawn siam ni a sawiin tun atang chuan sorkarin ngaihsak chhoh zel a tum thu a sawi a ni.

MZP hruaitute pawhin Tripura sorkarin Thaidawr tlang panna tur kawng a laih hi tlawhin tihtawp vat a nih theih na'n Mizoram sorkar chu hma la turin an ngen a a ni.

REFEGEE RESTRICTIONS

Lunglei district thuneitute chuan an district huam chhunga raltlante chu relief camp atanga an luh leh chhuah an khuahkhirh dawn.

Nimin khan Lunglei SP Pu Jerome Lalmuankima'n Thaizawl relief camp-ah he thu hi sawiin, raltlan camp-ah duty te dah an nih tur thu leh duty-te leh raltlan camp leader te remtihna lo chuan camp atanga duh ang anga luh leh chhuah hi khuahkhirh a ni ang a ti a. Lunglei district SP ho hian Thaizawl relief camp-ah Awareness Campaign for Myanmar Refugee buatsaih a ni a. He hunah hian Pu J. Lalmuankima leh staff te bakah Sub-Hqrs YMA, MZP Hqrs Lunglei leh MSU Regional Hqrs Lunglei te'n hun an hmang a ni. SP chuan raltlante chu Mizoram hmun hrang hrang a buaipui mek leh thalai tam tak suattu ruihhlo tawlhurutu ni lo tur leh a tilui an awm a nih chuan dan anga hrem an nih tur thu a sawi a. License nei lo va lirthei khalh lo tur leh an khalh lui a nih chuan dan anga hmalak a nih tur thu sawiin, Kenbo 125 bike-te te chu mahni awmna camp theuhah khawtlang hruaitute leh Police te nen tangkawpin, hmun khatah khalhchhuah theihlohva dahkhawm turin hmalak a ni ang a ti bawk.

Sub-Hqrs YMA Lunglei Treasurer Pu K. Lalhruaitluanga pawhin, YMA kalphung leh hmalakna te a tarlang a, an chenpuite tana hnawksak lova awm turin a chah a, YMA Dan Bu leh Chhiatni Thatni Inkaiahruaina Bu a hlan nghal a ni.

Lunglwei MZP Hqrs President Pu Johan Hmangaihzualla Ralte pawhin camp chhunga zirlai awm zatte leh an harsatna te MZP hnena thlen turin a ngen a, MZP chuan a theihna chinah a buaipui zel tur thu a sawi a. Tunhnaia raltlante pawikhawih an awm thin chu pawh a tih thu sawiin; Lunglei District chhunga raltlante chu hetiang kawnga inhnawnawih ve lo turin a ngen a ni.

MSU Regional Hqrs Lunglei Secretary Pu C. Lalthlamuansanga pawhin raltlan naupangte chu zirna ngai pawimawh tur leh nu leh pa pawhin an theihna kawngah an fate zirna lama an hmasawn theihna tura hma la turin a ngen a ni. Thaizawl Refugee Camp-ah hian tun dinhmunah chhungkua 167 awmin, mi 746 an cheng mek a. Zirna in hi Primary atanga Higher Secondary thlang a awm a ni.

GOOD FRIDAY

Vawiin khawvel chhandam tura Isua Krista khenbeh Ni (Good Friday) chu Mizoram pumah urhsun taka serh a ni.

Presbyterian Kohhran chuan inang tlangin thupui hrang hrang - 'Isua chung a rorelna', 'Pathian Kalsan nun' tih leh 'A thihna chu kan thihna' tih te an ngaithla ang a. Baptist kohhran chuan 'Midang tidama mahni inti dam thei lo' tih an ngaithla thung a, tualchhung kohhran ten mahni remchan angin hun an hmang bawk a ni. Caholic kohhran chuan Good Friday hi urhsun takin an hmang a. Mi tam tak chuan nizan atang khan Isua tawrhna tawmpui na'n chaw nghei a. Isua'n kalvari tlang pana kraws a putna leh a kawng zawh hriat reng na'n vawiin chhun khan Kraws kawngzawh an buatsaih bawk a ni.

(Byte)

Vawiin hi Good Friday a nih vangin Mizoram pumah dawr leh sumdawna hmun te khar a ni a, sorkar pisa, Zirna In, Bank leh sorkar dawmdawi-ina damlo inentirna (OPD) te pawh khar a ni.

Good Friday hi district khawpui hrang hrang bakah khaw hrang hrangah urhsun taka hman a ni a. Inkhawm bakah Isua tawrhna leh khenbeh a nih

chungchang hlate hmangin an lengkhawm bawk a. Kohhran thenkhatin ruai an theh lai-in a tam zawk chuan inkhawmna hun leh thingpui leh chhang inhona ni-ah an hmang a ni.

Good Friday leh Easter Sunday hi Krismas anga a ni ngai hman a ni lo va, a chhan chu Lal Isua thih hun lai hi Judate Kalhlen Kut hman lai vel Nisan ni 14 vel a ni a, chu chu March thla chawhnu lam, March 20 hnu, April 25 hma lam si, thla bial lai a ni a. Chuvangin tun thleng hian Good Friday hun hi March 20 leh April 25 inkara thla bial lai, zirtawpni apiangin hman a ni ta zel a ni. Easter Sunday atanga chhuta ni 50-na chu Pentikos ni a ni. Thla bial lai chhuta a hun leh ni ruat thin a nih avangin heng ni pawimawh te hi a hun leh ni a danglam deuh hret hret thin a ni.

<><><>

NIGHT OF VIGIL

Ningani Thianghlim an tih nizana Isua Krista mantira a awm tur lo venpuina hun kha kohhran hrang hrangin urhsun takin an hmang a.

Presbyterian kohhran puipate'n tualchhung kohhran hrang hrangah Lalpa Zanriah sakramen an thehpui a. Synod moderator R.C. Lalnghakliana chuan Armed Veng Kohhranah hmanpui-in senior executive secretary Rev. V.L. Luaia Hranleh chuan Bethlehem Kohhranah hmanpui-in executive secretary Rev. Dr. Rosiamliana Tochhawng chuan Sihphir Venglai Kohhranah a hmanpui a ni. Tualchhung kohhran hrang hranga sakramen thehpuitu Synod puipa dangte chu Synod Secretary (Jr.) Rev. B. Zohmangaiha'n Maubaw Kohhranah, finance officer Rev. Dr. K. Lallawmzuala'n Ramthar North Kohhranah leh finance officer tho Rev. Vanlalzuata'n Chawlhmun North Kohhranah te an hmanpui bawk.

Nimin, Maundy Thursday kha kohhran-te'n Isua Krista kraws a khenbeh a a awm champha Good Friday serhna hun intanna-ah an ngai a. Pathianni kalta, Isua lal anga Jerusalem khawpui a a luh ni atang khan chawlhkar thianghlim hman tan a ni.

Catholic kohhran chuan nimin khan ‘Ningani thianghlim’ chu urhsun taka hmangin he hunah hian Isua'n a zirtirte nen zanriah hnahnung an kilna chhui tharin Eucharist thianghlim buatsaih a nih bakah Isua'n a lo zirtir angin Ke-sil Rawngbawlina hun hman a ni a. He hunah hian puithiamte chuan kohhran chhung atanga mi 12 thlanchhuah te ke an silsak a, hei hian Isua'n hmangaihna leh inngaihtlawm a zirtir kha a entirna leh ti ve tura a tihna chhunzawmna a ni a. Venpui hun hman chhunzawm a ni.

<><><>

ASI

Archaeological Survey of India (ASI) chuan kumin February ni 25 atanga March ni 1 inkar chhunga Mizoram khaw hrang hranga pipute sulhnu zawmna-village to village survey an kalpuina-ah pipute sulhnu lung ker enegmawzat an hmu chhuak.

ASI-in survey an beihna hmun hi Khawzawl, Saitual, Serchhip leh Champhai district-ah te a ni a. Heng district a khaw hrang hrang Tualte, Chawngtlai, Lianpui, Khuangleng, Chhawrtui, Rullam, Maite, leh Ruallung khua-ah te lung ker leh lungkerna hmun hi hmuhchhuah a ni. Lungker hmuhchhuah ah hian mihring lem te, Sial lu lem te, Sangha lemte ker a ni a, Assistant Superintendent Archaeologist Salam Shyam Singh, K. Lalrinchhani Assistant Archaeologist leh an team-te chuan

he lung ker hmuhchhuah hi Mizo te tan thil hlu tak a ni a, Mizo hnam rohlu Mizoten Mizoram an luahna ti nghet tu a ni an ti.

Salam Shyam Singh chuan Tualte leh Chhawrtui a lung ker an hmuhchhuah techu mi dang pawna an la hmuh ngai loh thil thar tak a ni ati a, heng hmun nilo hmun dang a lung ker hmuhchhuah techu social media- a thlalak an hmuh hnua an zawn chhuah niin a sawi. He lung ker leh lung kerna hmun hi humhalh dan tur ruahmanna ASI lam chuan a la siam dawn a ni a ti bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

FIR

Food, civil supplies & consumer affairs department chuan mipui buhfai ei tur phur a kawng laka hralh rutute lakah FIR an thehlut.

Nimina sorkar thuchhuahin a tarlan danin Mizoram sorkar chuan mipuite hnena buhfai tha, hnianghnar leh buk dik taka pe turin tha thlah lovin theihtawp a chhuah a. Hetih lai mek hian Food Civil Supplies & Consumer Affairs Department in buhfai a lak khawm leh Supply Centre hrang hranga mipui ei tur a sem chhuah tur phurtute'n kawng lakah an hralh thin a ni tih finfiah a ni a. Buhfai hralh thentu lakah First Information Report (FIR) theh luh tawh a ni. Hetiang thil thleng hi FCS&CA Department chuan a ngai thutak hle a, buk dik taka mipui te hnena buhfai pek chhuah kawngah harsatna a thlenin mipui chanvo dik lo taka lak sakna a ni, department hotute chuan an ti a.

Thil dik lo titute dan anga hrem turin Sorkar chuan hma a la zel dawn a, thil diklo titu te do let turin tanrual puiah mipui te a bawk tih thuchhuah chuan a sawi a ni.

<><><>

CHHATISGARH SURRENDER

Chhatisgarh Sukhma dist-ah vawiin khan Maoist hel 22, thuneitute kutah an inpe a, an zingah hian hmeichhia 9 an tel a ni. Maoist-te hi Police leh CRPF hotute kutah an in pe a, inpe-te hian tanpuina pawisafai sing 5 theuh an dawng a, an mamawh dangte pawh pek an ni ang.

<><><>

HAMAS REJECTS ISRAEL’S CEASE-FIRE OFFER

Israel-in inkahhai neihna tura rawtna a siam thar ber chu Hamas chuan hnawlin a aiah indo tih tawpna tur leh mi hren zawng zawng inthleng tawna tur ruahmanna lian zawk siam a rawt a, Israel rawtna siamah hian ni 45 chhung inkahhai neih leh mi hren 10 chhuah tihte a tel a ni.

Hamas hian Israel mi 59 an la hreng a, an zinga mi 24 chu an la dam nia hriat a ni a, indona ti tawp turin an la inbe hlawhtling theilo a ni. Israel hian Hamas chhut chhiat vek chu a thil tum a nih thu sawiin Gaza-ah beihpui a chhuah chhunzawm zel

a, chhawmdawl hna thawktute an luh theih loh nan kawng an hnawh ping vek bawka ni.

<><><>

US STRIKES WESTERN YEMEN

US indo thlawhna-ten nimina Yemen ramchhung thlang lama tuialhthei chhek khawmna hmun an kahnaah hnathawktu mi 38 aia tlemlo an thi niin Houthi TV, Al-Masirah chuan a sawi.

US Central Command chuan Houthi sum hnar tih buai nan Hodeidah province-a Ras Isa tuialhthei dah khawmna hmun chu kah a nih thu sawiin Yemen mipuite tih nat an tumlo, an ti a, hetih lai hian Houthi health ministry chuan hnathawktu thite hi civil mi vek niin a sawi a ni.

<><><>